



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir yimyim

TAPAK 8

Ukraine-i long-range US missiles amshi tenzükogo

Xavi-i maneni Barcelona coach mapa inyaktsü

VOL. XXI ISSUE NO. 193 (ADOK 193) DIMAPUR ROGONÜ (FRIDAY) RONGCHII (APRIL) 26, 2024 ₹ 5.00

World Malaria Day: Küm 5 tsüngta state nung ramen ajema kumogo

Kohima, Rongchii/April 25 (TYO): Nagaland kübok district ajunga nung ramen ya kanga bulua liasü, saka 2019 küm nungi state nung ramen agi shirangba 49 dang liasü aser tasüba kata meliasü, ta Directorate of Health and Family Welfare ajanga agütsüba data nung ashir.

"Accelerating the fight against malaria for a more equitable world" omen nung ajemdaker Secretariat Conference Hall nung DHFW, Nagaland ajanga April 25, 2024 nü World Malaria Day amungdang iba data ya agüja liasü.

Iba sentong ya DHFW complex nung agütsüba liasü, saka Grade-IV employees shimba nung lisopur temeden meshia Angami Students' Union-i anepdang nungi directorate kima longkak aitba mechi tesem ya melenshüsä akum.

DHFW ajanga ashiba agi, Nagaland nung 2019 küm malaria positive cases 20 liasü, 2020 küm 12, 2021 küm ti, 2022 küm pongu, 2023 küm pezü aser 2024 küm tazüngla aser tasüba kata meliasü.

Iba sentong nung jembidang, danga state tem ama Nagaland nunga mapang talangka ramen ajanga timtem jenti agüja aru, ta Principal Director, Health and

Family Welfare Department, Dr E. Motsuthung Patton-i ashi.

"Asen kibong, asen nüburtem asen rongsenketzüng nung timtem agütsüba ya zübazülema yutsüla masü. Aser yamaji timtem liaka asenoki iba tashidak azüoktsü temulungtetba tulu nung nokdaka lir aser 2030 tashinung iba tashidak samatsütsü," ta pai ashi.

Ramen tashidak ajema akumba ya talisa nüburtemi shilem agiba aser telok balala tsüngta amalitep akaba ajanga lir ta ashir.

Tayongzükba jenti ajurua arur, saka teimla aser takokba lir, ta Dr. E. Motsuthung Patton-i ashi.

Mokokchung, Longleng aser Zunheboto amala district tem takok tajung ngutetogo, kong tesüba küm asem tashi ramen tashidak meliasü aser 'pre elimination' jenjang tongtettsü renemer, ta pai ashi.

"Health workers aser community volunteers, talisa ASHAS temi merangba inyakba ajanga iba takok ya ngutet, kechiaser parnoki state nung kinük-kisang ajak nung iba tashidak nungi jenbua alitsü mera agir aser tashidak agi meneper tem kanga junga anepalur," ta ashi.

Ao kin tejakleni aotsü asoshi kechisarena nung asen yanglu aser asensüshi nungdaker: Alemtemshi Jamir IAS Retd



(Abelen) Ao Senden 22 buba yimkong mungdang nung adener aser (Achiji) Taoba Nagaland Chief Secretary, Alemtemshi Jamir (IAS Retd)-i o jembidang tangokba noksa angur. (Mokokchung, April 25, 2024)

Mokokchung, 25th April (TYO): Aorji Tzüla arr apu alangdanga yutsü tejakleni aoba kin, arem min süngdonglidong tulu leptoka alima tasen/yim tasen kümteta aruba kin, Jungliyimti nung lungtrok sobaliba tasen ka latetba kin, taoba masü tarutsü tongtibang ta angatetba kin, iyongji asenoki tamangba yimsü tasen aser shisaliok tasen agizük aser tangar dena lemsatep, anungji, Tsüngremi asenok moatsü. Linük tenzükba nunga aser yimden yimli lenisüba tasen agizük aser 16 point agreement sign asüba nunga Aori shilem tulutiba agia Nagaland state kümtet. Item o ya taoba Nagaland Chief Secretary, Alemtemshi Jamir (IAS Retd)-i 25th April, 2024 nü Ao Senden

22 buba yimkong mungdang nung tayongzükba o jembidang metetdaksü.

Ao kin ya tasen pokteta yangluteter kin, tejakleni yimya tasen bushia aoba kin, mulungsentsü tesatem, tututu aser takatsünü, taremsük akaba kin, ajak tebilemba züngoka agiba aser temzüng metsünga reta benshiba kin, iba tanela ya tanü tashi mesama lir aser item ya asen Aor senmang aser Aor jakla lir, ta pai Ao kin dak aliba jakla kar lemsatep.

Paisa tanü tia indang kar lemsatepdang, asenok tang lenjem ka nung noktaka lir, tejenba aser tasenba putu na tsüngta – temelenshiji onsara tulu lir. Tanü joko kechisarena technology agi amokseper ajak inyaktetba putu. Sarkar sector

tilaba akümer aser private sector tuluba akümer, joko sarkar dak imlatsü kecha mali, atsüabong dak sentakba nung mangmangtepba (LGBTQ) mapang ka, tangar dang alakteta ajungertem dang litetba mapang ka, asenok iba putu tasen ka dang masü saka alima tasen ka nung koma lia taküm alitsü ta asüba tia ka nung lir, ta paisa ashi. Tanü iba ama putusen ka nung kechisaren nung asenyanglu (reform) aser asensüshi (restructure) nungdakba ajiteter ta ashi. Nisung ka asenyanglutsüba jemele masü. Temelenshi rangben – tebilemba, mulungsentsü, shisadangba, libaliru, yimyayimbong, inyaksangshi ajak melenshüsüla, ta pai ashi.

(Maneni tapak 2 nung...)

Tanü nungi mapang telatet makai shishilempaba tesemtem shibangtsü Lokti tentet balalai DCCI puküma nokdaker

Dimapur, Rongchii/April 25 (TYO): Dimapur yimti aser temeket nung shishilempar dang telok balalai tapi agi saru meshiba aser item ozüng alema mapa tamajung inyakba jung-junga anendaktsütsü asoshi sorkari sentong tajung atonga mapa kuma inyaktsü tim ta takhangba agüja Dimapur Chamber of Commerce and Industry (DCCI) ajanga mapang talangka nungi sorkar dang tayongzükba ola balala agüja arur, saka tanü tashi iba atema sorkari mera tejangja magitetba yong April 26, 2024 (Hokulbar) nü nungi tenzükba mapang telatet makai Dimapur yimti nung shishilempaba tesemtem shibangtsü sangdonga lir.

Iba mokdang nung pukuma lokti tentet balalai sangdong balala agüja arutar. Yamaji tax meshiba, senchi achiba aser merenshiba tebilemstü khuret mokoktet DCCI ajanga mapang telatet makai shishilempaba tesem shibangtsü ayongzükba nung onok dena lir, ta Confederation of Nagaland Chamber of Commerce and Industries (CNCCI) ajanga sangdong ka nung ashi.

DCCI ajanga ayongzükba ya teinyaktsü tim inyakter, kechiaser shishilempar dang telok balalai

saru meshiba, senchi achiba aser ammag-sangwa metitemi merenshiba joko maremsükteki kumogo, ta CNCCI ajanga ashi.

DCCI ajanga CNCCI dangi osang yokba ama CNCCI office nenok den nokdaka lir aser DCCI-i timtem-khuret lemsatepba nung sorkari mapang shidak nung tapet mera magira CNCCI-a longkak aittsü aser April 27, 2024 nungi tenzükba Nagaland tesem ajunga nung shishilempaba tesem shibangtsü, ta ashi.

Maneni nübur ajunga dang shishilempar temi akhangba pukuma nokdaksü ayongzüker, kechiaser iba tebilemstü yagi Nagaland nung aliba senso ajak dak kongshir, ta CNCCI sangdong ajangasa ashi.

Dimapur Ao Youth Organisation (DAYO)-ia, Dimapur Chamber of Commerce and Industry (DCCI) ajanga April 26, 2024 nungi tenzükba mapang telatet makai shishilempaba tesem mokdangtsü ayongzükba nung onoka dena lir aser nenok timtemba onokia angateter, ta sangdong ka nung ashi.

Saru (tax) balala meshiba timtem ajanga Dimapur nung rongsenketzüng mainba kisung masü saka Nagaland state ajunga nung kongshio, aser company

asorporate houses tulutem aser tejangja shishilempar temi asen state nung arua inyaksangshitsü temulung muludaktsü, DAYO-i ta ashi. Nagaland yimchiyimjung aser terenlok atema iba yimya anendaktsüsüla, ta ajanga ashi.

Nüburtem ajunga asoshi Dimapur tajungba kumdaksütsü tangatetba nung DCCI ajanga mapang telatet makai shishilempaba tesem shibangba nung onokia pusemer aser kulemi teka amteper inyaktsü renema lir, ta DAYO ajangasa ashi.

Nagaland nung aliba shishilempar ajunga den külemi Mokokchung Chamber of Commerce & Industry (MCCI) aser nüburtem aser lokti ajak DCCI den nokdaka lir, aser DCCI ajanga iba mera agiba ya kanga nungdaka aliba aser ajaki nungittsü tim, ta MCCI sangdong ka nung ashi.

Mokokchung nunga 1990s aser 2000s tetenzüklen iba ama tensa ajangshia liasü. Nüburtemi temulungtetba tulu nung ojang südaktsütsü tangatetba nung nokdak, aser tanübo Nagaland nung Mokokchung ya tesunepitba jila ka kumogo aser Naga national movement tenung nung Naga political groups temi tashiyim amshia senotsü

meshiba tebilemstü mali kumogo. Dimapur nung alirtemi iba timtem ajuruba onoki angateter aser DCCI ajanga mera agiba nung onokia nungiter, ta MCCI ajanga ashi.

NPGs temi ozüng alema inyaksangshiba anentsüla, aji mesüra nüburtem ain adokba metizüksü. Nagaland sorkari law and order shidak amshitsü atema temulung agütsüsüla. Sorkar asoshi nübur tesunep nung kumzükba ayutsü ya mezüng südaktsüsüla. Nübur anema mapa tamajung inyaker mazuokba mechi state sorkar-i parnok yarir ama angur, MCCI-i ta ashi.

Shidakba agi Dimapur ya Nagaland indang shishilempaba tesep (commercial hub) ka asütsüla sernung ashikülaker/rakzükrakter aliba yimti ang ka kumogo. Passenger amenba gari ishika dak alaka iba "commercial hub" aser Mokokchung tsüngta commercial gari kata mejajar. Ajidang masü osettsüset nung jenjang ya Mokokchung dang nungi Dimapur nung tasakba kumogo, aser item ya zünger mezüngmai aliba telungpur telok temi tazüokba makai tashiyim amshia senotsü meshiba ajanga lir, ta MCCI ajanga ashi.

Anungji Dimapur nung aliba nüburtem dang DCCI den nokdaksü aser ner yimti nung nenok kibur kumtettsü ayongzüker. Nenoki tanü mera tajung agiba ajanga Nagaland indang socio-economic ainba tsütsü temelenshi arutsü. Dimapur nung yimchiyimjung lira, tanungba Nagaland ajungalen kasaji alitsü, ta ashi.

DCCI ajanga akhangba nung sorkari telangzüba kecha magütsüra state tesem ajunga nung shishilempaba tesem shibangtsü ta CNCCI ajanga sangdongba ama teka amteper inyaktsü renema lir, ta MCCI sangdong ajangasa ashi.

DCCI ajanga mapang telatet makai shishilempaba tesem ajunga shibangtsü ayongzükba dak sendakba nung Zunheboto Chamber of Commerce and Industries (ZCCI) ajungben senden ka mena DCCI takhangba nung pusema nokdaksü lemtet, ta ZCCI sangdong ka ajanga ashi.

DCCI-i akhangba nung state sorkari telangzüba tajung magütsüra Nagaland tesem ajunga nung shishilempaba tesem mokdangtsü ta CNCCI-i sangdongba nung teka amteper inyaktsü renema lir, ta kasa sangdong ajangasa ashi.

Mokokchung aser Dimapur nung World Malaria Day mungogo



Mokokchung



Dimapur

Dimapur, Rongchii/April 25 (TYO): April 25 nü CMO Conference hall Mokokchung nung World Malaria day mungogo. Iba anogomung ya "Accelerating the fight against Malaria for a more Equitable World" omen nung ajemdaker munga liasü.

Sentong nung o jembiba mapang Additional Deputy Commissioner Chumlamo Humtsoe-i, Medical department and District vector borne Disease control programme nem parnok mapa tajung aser district nung takok tajung asoshi tenüngsang agüja liasü. Paisa, medical team dang kinük nung aliba tesemtem kong technology agi anünga lir, item tesemtem ayimjema inyaksü ajungshi.

Sentong nungsa Imkummongba Nungtanger DVBD, Consultant-i o jembiba mapang district nung Malaria

jenjang, IEC/ BCC inyakyim, malaria tashidak samatsütsü atema National framework aser District nung case control koda tongtibang iba indang lemsatepa liasü.

Sentong nung mapa tajungtiba inyakba ASHA ana aser Surveillance workers ana nem tetushi agüja liasü.

Iba sentong ya John lenisüba nung agi aser Assistant Malaria Officer Khenito-i tepela o jembiba liasü.

Kasa mapang nung Dimapur nunga "Accelerating the Fight against Malaria for a More Equitable World" omen nung ajemdaker April 25 nü CMO Conference Hall, Dimapur nung World Malaria Day mungogo.

Sentong nung o jembiba mapang Deputy Commissioner, Dimapur, Dr. Tinjongshi Chang-i, malaria anema raraba mapang healthcare workers temi kanga meranga inyakba atema parnok

nem tenüngsang agütsü aser ajak nem kasa healthcare agütsütsü aser alima ajunga den jangyumedema inyaksü kodang tongtibang iba indang lemsatep.

Malaria tashidak dak sendakba nung pai ajangshiba aser tashidak menatepa aoba indang jembiba mapang pai, iba ya tetsükdaksü ka aser ita 40 dak tema meranga inyakaka iba tashidak ya maneni health atema tebilemstü ka lir, ta ashi.

Maneni DC-i, malaria tashidak nokdangtsü kanga nüngdaka aliba tesem aser talisa yimdak yimtsüngtem nung iba tashidak nokdangtsü atema department aser lokti tentet balala longjemer inyaksü koda tongtibng iba indang lemsatepa liasü. Pai ashiba agi, merela sü lemsüba ya ajanga malarai tashidak nokdangba nung teyari tulu agütsür. DC-i, tashidak dak sendakba nung nüburttem nem

tangazükba agütsütsü koda tongtibang iba indang lemsatepa liasü.

Sentong nung DVBD, Dimapur, Peter Sangtam-i, Dimapur district kübok NCVBDC program aser inyakyimtem indang metetdaksü. Pai ashiba agi, 2027 küm tashi nungbo block ajak nung malaria tashidak samatsütsü nükjidong lir. Paisa, district ajunga nung malaria tashidak menatepa aoba nokdaksü aser malaria tashidak samar aliba tesem nung poktetshiba samatsütsü aser 2030 küm tashinungbo district nungi malaria tashidak meshimeshia samatsütsü nükjidong aliba lemsatep.

Kasa mapang nung lokti pela agizükba o jembiba mapang CMO Dimapur Dr. Limatula Aier-i, 2030 küm tashi nung malaria tashidak samatsütsü

nükjidong yur aliba ajangzüktsü atema ajak longjemer inyaksü koda tongtibang iba indang lemsatep. Laisa, iba tashidak ajanga timtem tulu bener arutsüba indang aser tangsa tang nokdangtsü kodang tongtibang iba indang lemsatepba den tashidak azüoktsü ateam jenjang tapet agia alibattem atema tenüngsang agütsü.

Sentong nungsa Assistant Director, UMS, Kikolul Khieya-i tepela o jembiba aser Wobeni Ezung, MTS, Dimapur Sadar Block, aser Aosungkum, MI nati tetenzük aser tatembang sarasadem agia liasü.

Sentong nung Dimapur District nung Surveillance Workers (SWs) aser Accredited Social Health Activists (ASHAs) tajungtibatem nem tetushi agüja liasü. Iba sentong ya Dr. A. Kavito Zhimomi, DPO CD-I/ DSO lenisüba nung agi.

Ao kin tejakleni aotsü asoshi kechisarena...

(Tapak 1 nungi...)



2024-2026 Ao Senden lenitsü ketdangpurtem noksa nung angur.

Melenshitsuäba luyim kar lemsatepdang, rongsenketzüng ajungkettsü asoshi rongsen bendenba yimya asenyanglutsüla. Tensa den apet aluyimba yimya melenshitsuäba, asenokji aluyimba tsütsü meyiptsüba dang kechiyong asen lima ali peria kar aser tziü mopung (climate) kanga tesütep. Kechi lu yimdir yimaka tensa den apet technology tasen amshia tulujunga züsentettsütsüla, ta ashi. Asenyanglutsüba temela masütsü, ibai adoktsü asoshi tongtibangsa tamang katetba, tazüokba, shitak langzütetba, tajung züsentetba, marketing aser tetoktepba nela adoktsü nungdaker, ta paisa shisem.

Tanabuba nung, industrial luyim tsütsü asenyanglu nungdakba ashidang, tongtibangsa asen lima yimjung, ali, sen, mapa inyaker mongin aser technology nungdaker.

Itemji ataloktsü asoshi ali temzüng aser Article 371 (A) amala ya khien reprangshitsü nungdaker, ta paisa tebilemdangtsü kar lemsatep. Iba den ano tourism tsütsü, look east policy, foot hill road, Naga yimden tebilemstü wadang, tetsür nem shilem lemsütsüba, tamangba yimsü jenjang aser ano tanga luyim tsütsü asenyanglutsü onük tajung aika bener arua lemsatep.

"Asenyanglu" aser "asensüshitsü" atemaji aluyimba, industry, tourism, shisaliok, medical, tamangba yimsü item luyim balala nung tebilemstü dak sentakba nung teshisadangba luden ka nungdaker. Koda asenoki Jungliyimti nung yimsoshiba ka tenzüka tejakleni aoba mesüka tanü putu nunga yimsoshiba tasen ka tenzüka aotsü nungdaker, ta paisa ayongzuka ashi.

Sentong nung Ao Senden

Tir, Chubawati Longchar-i menden tatem o jembiba aser Tir asütsü shimsang President-Elect Marsanen Imsongi menden agizükba o jembiba liasü.

2024-2026 Ao Senden lenitsü asoshi item ketdangpurtem nüngtet ludeni shima bener aruba ama teloki mulunga agizükba liasü.

1. Tir: Wb. Marsanen Imsong (M e r a n g k o n g) , Langpangkong
2. Tatong Tir: Wb. Aowati Ozüküm (Süngratsü), Asetkong
3. Tongti Zülur: Wb. Imtipokyim (Longkhum), Ongpangkong
4. Repsem Zülur: Wb. Bendangnükshi (Nokpu), Japukong
5. Senotsü Zülur: Wb. Yanger Pongen (Mongchen), Jangpetkong
6. Kimen: Wb. Lanupokyim (L o n g p a y i m s e n) , Tzirangkong

Deeper Public Engagement & Consultation tembangba sentong agi

Dimapur, Rongchii/April 25 (TYO): Kohima College, Kohima aser Sazolie College, Kohima atema Deeper Public Engagement & Consultation (Workshop & Programmes in Colleges) tembangba sentong April 25 nü DC Conference hall, Kohima nung agiogo.

Sentong nung o jembiba mapang DC Kohima, Kumar Raminikant, IAS-i, alima tziü mopung kanga menena kümдар anungji tziü mopung wazüka ayutsü atema ajaki pei shilem agitsüla ta ashi.

Paisa, global warming ajanga temelenshi bener arutsüba asen yimitem nunga ajangshidar, anungji ajaki tziü mopung menenba aser iba ajanga timtem bener arutsüba indang süoki ia agitsüla ta ashi. Maneni DC-i, kaketshirtem dang parnok nükjidong tongtettsü atema meranga inyaksü aser kasa mapang nung tziü mopung merek mereka toktsütsü asoshi yimya tajung süba-a benshitsuä ajungshia liasü.

EAC, Dr. Riku Khutso NCS-i o tatsüka jembiba mapang National Clean Air programme indang metetdaksü aser India nung mopung menenba non-attainment cities 131 indang list nung Kohima-a densema lir ta ashi. Paisa, Kohima College aser Sazolie College kaketshirtem inyakyim

indang metetdaksü.

EAC-i ashiba agi, iba sentong ya, mopung menenba aser mopung ya kodaser menener iba indang tangzükba agütsütsü nükjidong nung District Administration aser Zub-Zub India na longjemer ayongzükogo, ajita asünungdang nüburttem nem mopung menenba dak sendakba nung tangazükba agütsütettsü aser mopung jenjang tajungba akümtsü. Paisa, lanurtemi aika ajungmesotsü akoktsü ta shia lanurtem dang iba amokmeren ya bentettsü asoshi jenjang tapet agitsü anungshia liasü.

Sentong nungsa reel videos yangluba tetoktepba osang metetdaksü aser sempet lemja liasü. Iba tetoktepba ya Kohima College nungi Riidiionei-ii Kuotsii'er team-i akok aser parnok nem senpet sen 10,000 agütsü. Tanabuba nung Kohima college nungisa Seyielhounuo Keyi-i aniba team liasü aser parnok nem senpet sen 7,000 agütsü. Tasembuba jenjang nung Sazolie College nungi Imtinongtet Lemtor-i aniba team liasü aser parnok nema senpet sen 5000 agütsü. Kasa mapang nung consolation sempeta pongu agütsüogo.

Sentong tatem District Administration-i college tem nem bicycle aser waste bin tem agüja liasü.



April 25, 2024 nü Srinagar nung National Conference Tir Farooq Abdullah aser J&K Congress Tir, Vikar Rasool nati osangbenertem den jembidang tangokba noksa nung angur.

Tanü states/UTs 12 nung Lok Sabha menden 89 atema election agitsü

New Delhi, Rongchii/April 25 (Agencies): Hokolbarnü states aser Union Territories 12 nung Lok Sabha menden 89 atema election agitsü.

Lok Sabha menden 89 nungjagi Scheduled Castes atema menden 9 aser Scheduled Tribes atema menden tenetbo wazükja lir.

2019 küm Lok Sabha election nung item menden 89 nungi BJP-i menden 55 aser Congress-i menden 18 nung takok ngua liasü. Taoba election nungji BJP-i aniba NDA-i menden 61 aser tang aliba Opposition INDIA teloktep nungi party temi menden 23 ngua liasü. Taoba election nung Shiv Sena-i menden 4 aser BSP-i menden ka ngua liasü.

2014 küm Lok Sabha election nunga item menden 89 nungi NDA -i menden 46 aser INDIA teloktep nung aliba party

temi menden 35 ngua liasü. Hokolbar Lok Sabha election tanabuba shilem nung menden 89 atema candidate ajak senteper 1,210 lir. Candidates teimtibaji BSP (74) nungi lir, iba sülen BJP (69) aser Congress (68) na lir. Candidates teimtibaji Karnataka state nung lir (247), Maharashtra nunga candidate 204 aser Kerala nunga candidates 189 lir.

Hokolbarnü election nung tokteper candidate 250 anemabo oziung alema inyakba ken otem benoka lir aser item ama candidates teimtibaji Kerala (67) nung lir, iba sülen Maharashtra (49) aser Karnataka (39) na lir.

Party tem sasep nung oziung alema inyakba ken otem benoka aliba candidates teimtiba aliba party ji Congress (35) lir, iba sülen BJP (31), CPI(M) (14), BSP (6) aser CPI (5) lir.

Iba dak alia oziung alema inyakba ken o benoka alir Independent candidates-a 74 lir.

Hokolbarnü tokteptsüpur candidate 390 bo crorepati lir aser parnok rongnung takartibaji Karnataka nung Congress candidate Benkataramane Gowda (crore 623) lir, iba sülen Congress nungisa D K Suresh (crore 593) aser BJP nungi Hema Malini (crore 279) nunger lir.

Lok Sabha election tanabuba shilem nung tetsür candidate 100 lir. BJP nungi tetsür candidate 9, Congress nungi trok aser BSP nungia tetsür trok lir.

Lok Sabha election tanabuba shilem nung candidate 7 bo arrshi küm 25 lir aser candidate tem rongnung tambutisangji Rajasthan kübok Chittorgarh constituency nungi Independent candidate arrshi küm 88, Kalyan Singh Bhati lir.

Pakistan aser Iran külem sangdong atema Iran den jembidar: MEA

New Delhi, April 25 (Agencies): Brihostibarnü Ministry of External Affairs (MEA)-i, tawa Iran Tir, Ebrahim Raisi-i Pakistan semdangba mapang nung linük ana külem sangdong nung Kashmir tetshiba atema India-i Iran ketdangsertem den tongtepratepa jembidar, ta metetdaksü.

New Delhi nung osangbenertem senden ka nung MEA otongdar, Randhir Jaiswal-i, "Onoki iba onük ya Iran ketdangsertem matsüngdang benokogo," ta metetdaksü.

Iran Tir Ebrahim Raisi-i Pakistan semdangba mapang nung Iran aser Pakistan napronglai külem sangdong ka ajanga, "Pakistan aser Iran nati Kashmir ken o ya region nung aliba nüburtem taginüba nung ajemdaker yimjung ajanga latettsüla ta bangjemer," ta metetdakja liasü.

Pakistan Ato kilonser Shehbaz Sharif-i jaokba nung ajemdaker April 22-24 anogotem nung Iran Tiri Pakistan semdanga liasü. Tir den Foreign Minister Amir Abdollahian, cabinet minister tem aser tongti ketdangsertema aika liasü.

Tatembangbuba anogo nung

Iran aser Pakistan nati Kashmir atema jembiba den külemi regional aser international onüktema süoka jembia liasü.

"Linük anapronglai Kashmir ken o ya region nung aliba nüburtem taginüba nung ajemdaker yimjung ken o jembia latettsüla ta bangjemer," ta külem sangdong nungji shia lir.

Pakistan Ato kilonser Sharif-i senden nung Kashmir onük süoka liasü. Iba sülen osangbenertem senden nung Iran-i tangatetba tajung lemsatepba atema Sharif-i Iran dang pelaba lemsatep.

Ajisüaka osangbenertem senden nungji Iran Tir Raisi-i Kashmir metetshi saka Palestine nung tashiyim amshirtem anema raratem Iran-i pusemer, ta metetdaksü.

Ano külen MEA-isa, US report ka ajanga Manipur nung meimchir temedentem alema inyaker, ta asüba osangji tai ta metetdaksü.

US State Department indang report aija MEA otongdar, Randhir Jaiswal-i, "Iba report ya tajemdakdak maka aser iba ya ajanga parnoki India junga mangatetba sayur. Onoki ibaji magizüker aser nenok danga kasaji inyaksü ajungshir," ta metetdaksü.



April 25, 2024 nü Murshidabad district nung actor aser BJP lenir, Mithun Chakraborty-i party candidate, Gouri Sanker Ghosh atema nüboyimtsüdang tangokba noksa nung angur.

EC-i PM Modi aser Congress lenir Rahul na dang nungi telangzüba meshir

New Delhi, April 25 (Agencies): Ato kilonser Narendra Modi aser Congress lenir Rahul Gandhi nati Model Code of Conduct (MCC) alema tesempa o prokba den tiyazü jembio, ta tena nem tai tongloksüba dak sendakba nung Brihostibarnü Election Commission of India (ECI)-i tenaprongla dang April 29 nü anüngdang 11:00 ako tashi nung telangzüba agüjang, ta tuyuogo.

Congress aser BJP napronglai tamangba yimsü, kin mesüra oshi nung ajemdaker

tesempa proka telemsa adokdaksür, ta tai tongloksüteper.

EC-i, Representation of the People Act kübok Arrla 77 benokogo anungji election atema nüboyimtsürtem azüoktsüji party Tirtem mapa lir, ta metetdaksü.

"Candidate tem, talisa nüboyimtsürtem azüoktsüji party tem teinyaksü mapa lir. Election atema nüboyimba mapang nung temaba menden nung alirtemi aibelenra parnok nem temerenshi tuluba

agütsütsü," ta Election Commission-i metetdaksü.

Hombarnü BJP-i, Congress lenir Rahul Gandhi-i linük nung kanga sensak tia rate tamajungba akümer, ta tiyazü jembir, ta tai tongloksüba parnoki Election Commission dang Rahul Gandhi anema inyaksü mepishia liasü.

Ano külen Congress-ia election commission ajurua Ato kilonser Narendra Modi-i Model code of conduct alema inyakogo, anungji pa anema inyaksüla temepishiba agüja liasü.

Bihar nung hotel ka arongba lendong nung nisung 6 asü aser 30 yiru

Patna, Rongchii/April 25 (Agencies): Brihostibarnü Bihar yimtiba, Patna nung Patna junction railway station anasa hotel ka arongba lendong nung nisung trok asü aser nisung 30 dak tema yiruogo, ta police-i metetdaksü.

Mezüng bushisüngdangba sülen police-i, gas cylinder ka apokba ajanga hotel nung mi adok asütsüa akok, ta metetdaksü.

Home Guard and Fire Services DG, Shobha Ohatkar-i, "Onoki hotel 16,000 dak tema mita oa tekümdangtsü metetdakja arudar. Kari tashi angaa inyaker aser karibo tashi mangar. Iba lendong ya temelung magütsüba agi atalok ama bilemer. Mezüngba bushisüngdangba ajanga iba ya cylinder apokba agi asütsüa

akok ta bushitetogo," ta metetdaksü.

Ano Senior Superintendent of Police, Rajeev Mishra-i, mi lendong atalokba sülen hotel building nungjagi nisung 20 dak tema kümzüko, ta metetdaksü.

Mishra-isa, "Iba lendong nung nisung trok süogo. Parnok maitsüji tang tashi nungbo mejangja. Iba lendong nung yirurtem hospital-i anir ogo," ta metetdaksü.

Osangbenertem den jembidang DIG (Fire), Mrityunjay Kumar Chaudhary-i, "Anüngdang 11:00 ako meta onok nem iba osang metetdaksüba sülen onoki miji ensepogo. Jungjunga bushisüngdangba ajanga iba lendong atalokba kuli jangjatsü," ta metetdaksü.



April 25, 2024 nü New Delhi nung AAP party election nüboyim ken sayaba sentong nung AAP lenirtem- Sanjay Singh aser Gopal Rai na den tangartem tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, APRIL (RONGCHII) 26, 2024

Aor mesük !

Aor masütsüa akok saka nisung ka topur tajung, temerük aser süoshia petpeta sübor senzüya ngura, itemjibo Aotsür - Aor mesük ta jembia aru. Aji oda, Ao lima nung züsentetba masütsüa akok saka jang tajung süra ajia Aor jang aser mersüa tajung süra ajia Aor mersü ta kechisarina tajung ajakji Aor mesük liasü. Kasaji, nisung kar Tsüngrem meteta ochishia lira itemjia Aor mesük, nisung kari temeim mapa inyakra itemjia Aor mesük aser ano nisung kar Tsüngrem temeim osang tajung lemsatepa sayutsüngia jajara, itemjia Aor asütsü südi ta bilem. Ano, yimten mapa nunga nisung kari mapa koka inyakra itemjia Aor amato ta jembi. Aji oda, tajung-tajung ajak Aotsür Aor mesük aküm aser tamajung ajak tangar mesük kümdaktsü. Iba tenüng tajungji Aotsür Aortemi kangshia meshizükba masü saka tangari asenok mapa tajung ngur jatsüba tenüng tajung aser narokümtem lir. Ibaji angati anguba masü saka Aotsür Aor tsürabur tajungtem aikati pei kisüng ajangzüktsü aser pei akatsü memerangi tangar ajangzükdaktsütsü asoshi pei taküm, mapang aser kibong ajak bendanga agüja tangar tajung kümdaktsütsü asoshi inyakba ajanga aazükba senmang lir. Aji oda, kaketshisatsü bushiba tsütsüa takok tajung ngua züngtetra itemjia Aor mesük, tangar bendanger oshi junga jembitetra ajia Aor mesük ta tangar kintem Aor mesüka alitsü merangtepba putu ka liasü. Ajisüaka, tangbo asenok maparen aika nung Aor agi Aor memesük aliba asenokia meteter. Ashiko, tanübo Aor ser nung Yisu temeim osang tajung mezüng agizüker kinbo memesük limapur dang nungi tamajungba jenjang nung asenok aika lia alitsüa akok. Aortemi tangar dang Yisu yimsü tajung agizüka amanger Khristan purtemibo tiyazü mejembir, ochimashi aser tashiyim mapa meinyaker, nüktapangta mebenshir, yi majemer, sali moko machir ta sayutsüngia aru, anungji tangartemi item o ji agizük aser melenshi. Ajisüaka, Naga nungger ajak tia majung, lia lia Aortemi Aor memesük alitsü tenzük. Aori kechi majung ta jembi, itemji Aortemiang ano meyiper benshitsü tenzük. Aortemi Aor memesük aliba tetezüji tanü putu nung Aotsür Aortemi pei tsüraburtem mesüka malir ta angatetdi. Aji oda, tanüa nisung kari tashiyim agi takok angutsü merangra itemji Aor asütsüa akok saka tangaribo Aor a ta mamangtsü. Kasaji, Election nunga Aotsür Aor kari danga proxy vote enoktsüra itemjia Aotsür Aor memesüka ta tangari jembitsü. Office nunga Aotsür Aor kari danga pei ajungtsü aser pei akatsü dang bilema ochishia melitetra, tangaribo parnokjibo Aotsür Aor memesüka ta bilemstsü. Yimsürtem rongnunga kari danga nübortem dang memeim pei asoshi dang bilema inyakra, itemjibo Aor memesüka ta tangari tenüng asentsü. Temoatsü kaji, tanü putu nung alir Aotsür Aoertem ya teimbaka memetetba limatem nung nübortem tanela aser shisa tenük lapoktsür sannüker aser tesayur chirnurtem lir. Ano, sannüker aser tesayursa mesüka government mapa nung alir Aotsür Aoertem kong koba tesem nungsa lidir, parnok aikati yimten masü Tsüngrem tenzük amai arogo aser lokti nung shilem tulu agia memetetba purtem tejakleni anitetba tsürabur chirnurtem lir. Ibayongji, tangar dang meima tajung kümdaktsür nisungbo Aor mesüka ta tangaria jembi. Aji oda, Naga lima nung Aortemi mapa tajung inyakba aika nung mezüng asüba tenüng ya masü saka tajung ajak Aor mesüker ta jembia arubajiang shitakba asenok Ao kin senmang asütsüla. Iba senmangji mesamadaktsü amshitsü atema Aotsür Aoer alidak ajak nung senotsü amshibaren nung ochimashi mapa tilaka ta meinyaktsüla aser ali-kimong mesemtetba maparen nunga morumoru masütsüla. Aji oda, asenok alidak kidang kiyongertem den Aor mesüka temeim aser awashi sayua alitsübjaja Aor mesükba mapatem asütsü. Aor jakla nung pei kisüng agitsü bilema tangar indang dena agisema mebendener saka akok tashi meranga inyaker pei inyaktetba rongsen agi tangar yaritsüang meranger, aji Aor mesük. Aor ya Tsüngrem metetba kin aser ochi meimba nübortem lir. Aji oda, kari Tsüngrem meteta indangindanga litetra aser ochi meima inyakra, parnokji tanüa tangaribo Aor mesüka ta jembitsü.

OLEMSABANG

YA TEJANGJA LIR

~ Temjentenzük Changkiri

Tanü asenok rongnung shishilembaba "company" indang mangashidanger mesüra memetetbo aikbo malitsü südi. Akhi 1608 nung British East India Company India linük tonga aruba nungi tenzuka, asenok aikati company balala indangji meteta lir. Asen Nagaland nunga iba ama shishilembaba company aika tonga lir aser item company nungji inyaka pokyimertem asenok aika dang lir. Item company-temi inyakba yayim nungji parnoki olongrü ka yamai amshir, "Upline- Downline". Iba ojang ana yabo joko asenok aikati mokosto süa lir. Kodang item company nungji asenok tenüng züluoka züngsem kümdir, iba anogo nung jagi aseni downline bushia tenzüktsü. Downline bushiba tetezü company atema customer tasen bushiba lir ta asenoki meteta lir. Koma koda tekaraba nung nisung timba aseni nguteter, yamaji asen downline timba akümer. Aser downline timba akümba amaji, asenji temaba upline-i atur. Upline temabai atuba amaji asen tajangzük tuluba angur. Iba company inyakyim ya asenok aikati meteta lir. Asen upline anogoshi temabai tunera, aseni customer timba bushia company nungji züngsem kümdaktsütsüla. Customer atsüa arutsü atema company nung aseni ajangshiba temoatsütem indang kuli asütsüla. Kodang yamaji inyakdir asen temba jenjangi tujen dang atutsü. Ibaji mesüka asenok Khristanem ajak ya asen Tsüngrem, taküm aliba Tsüngremer temoatsü company nung inyakertem lir ta nibo bilemer. Iba ya temulung nung asenoki zünga alidang ni agüja aliba onük 'Ya Tejangja Lir' nungji tatsü agi yamai asenok den lemsatepner.

Ni lanuwa mapang arogo nung sayutsüngir kati olen ka ashiba ni kodanga mamar aser tanü tashi iba nungji jajatsü meranger. Pai yamai shia liasü, "Tsüngremi ne nem moatsütem indang kuli süang". Tsüngremi asen nem moatsütem indang miima mayui item indang ana aser talang nung alirtem dang kuli asütsüba aser asen akaba lemsateptsüba indang tesayuba agütsü. Ya atangji kanga shitak ta ni agizük. Kechiyong iba olenji ni soa intetba otsü den kanga tapet liasü.

Kübu aser kütsü nati tangar ama kaketshisatsü tulu mengutet. Iba ama kibong nungi ni inteta arudang, akokba tashi agi ni, ni atenba lokti tentet aser arogo nung lenirtem nungi angazüktsü meranga liasü. Ozü tsüraburi mesayutetba aser parnoki memetetba ka tangar nungi angazüktsü atema lenmang bushitsüji kanga temelabo masü! Tangarba jagi kodang parnok nem Tsüngremi shisatsüba moatsüba nungi mokurui kuli süa jembidir mesüra sayudir, iba ama mapang nungji ni atema milen tesangwa yaloktsüba mesüka temoatsü ngua aru. Aser item nungji amendaker taküm nung tongtibang mera tasen aika agia arudar.

Tsüngremer temoatsütem kuli asüba aser ano mapa agi lemsatepba anaprongla ya kasasa tongtipang lir. Asenok aikati takartemi Tsüngremi moatsüba nungi rongsen teyari agütsüba, senpet balala agütsüba, tenla tulu agütsüba itemji dang Tsüngremi moatsübatemji lir amai bilemer. Saka kasasa tongtibangji Tsüngremer temoatsü lemsatepba nungji asen nem Tsüngremi kechi shisatsü terajem moaja lir, ibaji memetetba purtemi angazüka temoatsü süa amshitetsüa lemsatepabaja lir. Temeshi lai nung shia aliba ama, "saka shibai kurua prokdir pai kurua arutsü, aser shibai jenti prokdir pai jenti arutsü"- 2 Korint: 9:6. Asenoki asen nem Tsüngremi moatsübatem indang kuli asüba aser lemsatepba temji Tsüngremer temoatsü company nung metsüjang proker ama lir.

Ni lanuwa mapang koba olong ni sayutsüngir nungi angazük, iba indang temeshi laishiba nung bushidang dang, ni ya ngutet: "...Ner kinungertem dangi oang, aser Kibubai na asoshi kechi mapa inyakogo aser ne dang aochiogo, iba indang parnok dang shiang"- Mark: 5:19; Luke: 8: 36: "Ner kidangi meyipa oang, aser na asoshi Tsüngremi mapa tulu koda inyak aji sangokjang. Yamaji oa yimti nungji Yisui pa asoshi kodaka inyak aji sangoktsü". Ibr: 13:16: "Tajung inyaktsü tesendokma, aser na kechi aka ibaji tangar den lemsatepangma, kechiyong ibala tenlatem agi Tsüngrem mulung achir". Apijemtsü: 11:24: "Nisung kati mokurui agütsür, saka tali akar; tangar kati pai tagütsütsü tim sota ayur, saka tanüng dang tendaktsür". Item lai tekongtem dak alia ano aika lir. Tsüngremi asenok dang tajung inyakba indang kuli asütsüba aser pai moatsübatem lemsatepaa timtemer yaritsüba; item ya asenoki kodang inyakdir Pai ano tali asenok nem moatsütsüba indang tejangja angur. Kü lanuwa mapang sayungtsüngir shibai kü mulung nung tsünga jembi, pai atangji ochi o agütsüogo ta tanü tashi kanga pelaa Tsüngrem tenüng asanger.

Nia Tsüngremer temoatsü company nung tenüngbo tasoba anogo nungi asaa dang Pai züluoktsü. Saka Pa temaatsütem indang kangabo süoki ia meshisadangi talangka lia aruogo. Item memeteti aliba tesüiba anogotem asoshi sasaa bilemer! Saka, kechi süiogo, aji süiogo! Tejaklen kechi tajung lir itemji arishia, Pa temoatsütem indang kuli süa aser ano akokba tashi nung mapa agi yaritepa alitsü meranger. Aseni kodang Tsüngrem dak amanga ochishia meranga inyakdir Pai moatsür. Aser Pai moatsübatem indang aseni kuli asüba ajanga, kodang adianu kar taküm nung tangazükba ngua temoatsü ngudaktsüdir; kodang Pai maatsübatem nungi nungdakbapur nem teyari agütsüdir; idangji, asen taküm kibongji Tsüngremer temoatsü company nungji temaba upline-i atutsü. Tanü ni kechi Tsüngremi moatsüba shisatsü agi mokurui lemsatepogo, iba ya ajanga tazünger kar taküm kibong nung danga tangazükba ngua temelenshi adokdaktsüra, ni metet, ni Tsüngremer temoatsü company nungji upline-i tujen atutsü. Ya tejangja lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Impur Bible Seminary 66buba graduation sentong agiogo



Impur, Rongchii/April 25 (TYO): Impur Bible Seminary (IBS), 66 Buba Graduation Ceremony April 25, 2024 anogo nung "Tenzüksü asoshi Jatet" (Mark 10:42-45) omen sür kanga takok ngua Impur nung agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Iba sentong nung student 25-i Diploma in Theological Studies certificate agizükogo.

Iba sentong nung tongti O jembir Rev. Ponen Longchar,

Pastor, MTBA liasü. "Tenzüksü asoshi tongtibangtibaji ajemalua tila akümba ya lir. Anungji shibaisa iba tangatetba nung tenzüker, parnok asoshi tenzükbawadanganung tetsübutsü kecha makai sadok-sadoka tenzüksü aser tenzükbawadanganung takok aser temoatsü parnok meyong asütsü," ta Rev. Ponen Longchar-i tayongzükba tulu agüja liasü.

Tensa tia ajak ajurua aotsü saka asenok Tsüngremer luning inyaker aser Pa asen lenir

ta angateta ajemalua tenzükanung, ta paisa ajungshia liasü.

Mrs. Imtilemla, Principal-i anir tesayur aser tenzükerkema nendaka sayua inyakba ajanga tanü tanurtem tajung aika adoka asen India nung dang masü saka alima tesem balala nung tenzükdar.

Maneni Impur Bible Seminary nung shirnoksa arua züngdir Tsüngremer temoatsü agia zünger tenzükbawadanganung nokdaksü Tsüngremer leniba agüjang, ta ABAM-i sarasademer.

Pakistan nung pei kidang nungi meindokba Khristanem Arogoi yarir



Faisalabad nung tongti putir, Indrias Rehmat leniba nung Khristan lenirtemi April 22 nü Akbarabad semdanga Khristanem ajurudang tangokba noksa nung angur.

April 25, 2024: Central Pakistan nung Khristan kibong aika pei kidang nungi meindokba sülen item Khristanem yaritsü atema Arogo kati senotsü lenmang bushitsüdar.

Tawa Pakistan kübok Akbarabad nung taoba mapang National Assembly (lower house) nung opposition lenir, Raja Riaz meyong commercial area ali acre 57 nung alir Khristan kibong 75 dang iba tesemji toktsür oang, ta court-i tuyua liasü.

Central Punjab province kübok Faisalabad diocese-i item kibongtem yaritsü atema züngsem teneti akümba committee ka tentetogo.

Akbarabad nung alir Khristan, Shahzad Masih-i, "Riaz tebei onok dang nungi senotsü tera dang agia onok yaria jenokdakja liasü. Tang alirtemibo onok dang taochi mesayur aser onok ket nung sen mali. Onoki tekümsüker kar nüngdaker," ta metetdaksü.

kibong 50 dak tema lir.

Rickshaw anishir Masih-isa, "Nisung alitsü mejungi aliba li yanglushirtem rongnung ozü oboula-a densema liasü. Sorkar li atsünga aliba sülen ali kibur akümtsü atema alizüka arur. Utility bill ajak kübu tenüng nung register süa lir," ta metetdaksü.

Riaz tedi tambusang, Raja Fazal Abbas-i, lawyer temi ashiba ama onoki inyaksü, ta ashi.

1960 küm Riaz tebei Akbarabad nung Khristan sensakertem angati jenoka lidaktsütsü atema temelaba agüja liasü, saka 1998 küm Khristan aser Muslim kibongtem tsüngda mangatetep adok aser Akbarabad ya sorkar kimong lir, ta ashi.

2020 küm March ita nung Supreme Court-i Khristanem dang iba tesemji toktsür oang, ta tuyuba sülen Khristanemi Muslim nung dang nungi aliji alizüktsü atema jembir. Muslim kibong jagi ali square meter shia

sen 775,000 agüjang ta ashi.

Catholic Bishops' National Commission for Justice & Peace Director, Khalid Rashid Asi-i, Khristanemi ali atema tang tashi nung sen million 13 bo agütsüogo, ta metetdaksü.

"Tangbo ali jenjang kanga tuyuogo, ibayongji Khristanem dang tangbo ali square meter shia sen 1,500,000 agüjang ta ashir," ta committee nung züngsem kati metetdaksü.

April 18, 2024 nü police-i Khristan kibongtem ki shibangtsüogo. Khristanem meindokba anema Khristan meyirjang aika adenshia ghonda 8 longkak aita liasü.

Faisalabad nung tongti putir, Indrias Rehmat leniba nung Khristan lenirtemi April 22 nü Akbarabad semdangogo aser Khristanem nem ochi temeden agütsütsü atema inyakdar.

Khristian senator, Khalil Tahir Sindhu-ia Riaz ajurua ali jenjang ajemang ta mepishiba ama Riaz-i ali jenjang ajemtsü melungogo.

ANOGO ABEN TSÜNGREM DEN

Anogoshia tepela

"Teimla nung pela-ang, timtem tekangshi nung aremzükanung" (Rom 12: 12).

Aiben asenoki rara malibaji taküm nung tepelaji lir ta bilemer. Teimla nung pelaang aser timtem tekangshi nung aremzükanung ta Laishibai ashir (Rom 12: 12). Yisui anguba maksü aser timtem agi Pa tepela nokdangtsü mekoki liasü, kechiaser pai aremzükanung aser teimla ayu (Ibri 12:2).


Miim tepelaji, mapa tasak agizüka jangjungmara mesüdaksü inyakba, aser tuokrong tia aremzüka bentetbaji lir. Kodang timtem nung anüngba anener, tenüngsang agütsür aser tepela angur. "Tajepba kaonung saka anepdang tepela arur" (T. ken 30:5b).

Taremzükanung melira tepela samar. Takümüji ayong aika, sentaka aliba ka lir. Yimzüka aolen makaba ayong kecha mali. Taremzükanung makaba jagi taitlen aser taolen tetsüngda mapang timtem mapang kümdaktsür. Yisui ashi, "Asenoki külen jagi odi", iba tetezü asenok tetsüngda nung maraksettsüla (Lk. 8:22-25)

Taremzükanung makaba teloki parnok tepelaji dang tepseter masü, saka parnoki tangar tepelajia tepseter.

Tangar tepela nung peladaktsübaji miim tepelaji lir. Tepela kibongji taremzükanung agi yanglur. Kinüngbui kinüngtsüi renemba magizüksetba jagi kinüngtsü tejangraba tepseter. Kinüngbur mabensaba kinüngtsüi maremzükanung setba ajanga kinüngbu ina terenlok akatsüba nung nokdang. Tanur tsütsü tsüraburi taremzükanung makaba ajanga tanur tepela tepseter.

Idaho nung samaba pastor tasümanung nguogo



Pastor Gene Jacobs

sarasademtsü sentong ayongzükba liasü.

Mongolbar aonungsa 11:00 ako nung Arogoi pastor Jacobs atema mangyimer, ta metetdaksü.

CCTV camera ajanga pastor Jacobs-i pa teti Tenla kidangi aoba lenmang nungi tanga lenmang kati meyipba jangjaogo. Pai mapang shia tenem kati jaja atuba tenemtsüng kati pa atur.

Pa samaba osang prokba sülen Shoshone County Sheriff's Office aser Pinehurst Police nungi nisung 40-i motorbike aser tayimtsü amshia pa bushi tenzükanung. Lenmang nung pa indang tzi bottle aser phone angu, saka phone ji shibanger liasü.

2007 küm Real Life Ministries Silver Valley Arogo tenzükanung mapang nungi pa Arogo nung tongti pastor liasü. Western Washington nungi Jacobs-i tamalen U.S. Navy nunga tenzükanung liasü aser Boise Bible College nung azüng.

Arogoi sangdong ka ajanga, "Nisungtemi Yisu den tesendaktep tajung ayuba nung Gene-i jangratem angur aser Tsüngrem taochi ajanga nisung ajak, kibong aser tesendaktep ajak tanaben tajungba kümdaktsütsü ta pai amanger. Gene-i pa azünga aliba mapang nung par kibong züngsemtem den amonger, guitar atemer aser North Idaho nung tetsüng agi mesüra bicycle amshia senzüksü jangrar," ta metetdaksü.

April 25, 2024: US kübok Idaho state nung ketdangsertemi tawa samaba pastor tasümanung anguba sülen Arogo züngsemtemi mangyimdar.

Real Life Ministries Silver Valley nung tongti pastor, Gene Jacobs samaba osang metetdaksüba sülen pa bushi tenzükanung aser Mongolbar aonung Pinehurst nung pa tasümanung nguogo, ta Pinehurst Police tongti, John Richter-i metetdaksü.

Real Life Ministries Silver Valley ya pastor Jim Putman-i tentetba Real Life Ministries Arogo kübok lir.

Mongolbar nikongdang 4:00 ako nung Real Life Ministries Silver Valley-i pastor Gene Jacobs samaba osang sangdonga liasü.

Real Life Ministries Silver Valley-i, "Ozü pastor, Gene Jacobs tanep Tenla kidang ayongzükba sendeni maru. Pa kidang nungi tetsüng agi apusoa liasü saka sendeni maru. Tang tashi nung pa kong aliar mejangja," ta metetdakja liasü.

Arogoisa nikongdang 6:00 ako nungi pastor atema

AO OSHI ANGAZÜKDAK:
TANÜ ANGAZÜKTSÜBA OJANG



Süngkensüngrar

(v) temulungi agizüka mechitetba (repulsive)

* Telok nung süngkensüngrari chi mechiyongteter.

Süngkhu

(n) nisung kati abenba süngbong (a bundle of firewood carried by a person)

* Kibong shia süngkhu kaka benjong kibur nem bentsü.

OLONG PAITEP # 6768

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6767 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen,
- 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi,
- 8. Lah, 9. Jangkok, 12. Akok,
- 14. Nashi, 16. Sür.



Ni lanuwa mapangbo auer yagi süoshi yamaisa asemer ta bilema liasü.....

..... saka kodang ni tain aküm, shitakba auer süoshiji yamai asemer ta meteta aru.

LS elections tanabuba shilem nung constituency 5 nung vote agütsütsü

Guwahati, Rongchii/April 25 (Agencies): Lok Sabha election tanabuba shilem nung Assam kübok tongibang constituency pongu nung April 26 nü election agitsü.

Assam nung tanabuba shilem nung election agitsü aliba constituency tem rongnung Nagaon, Karimganj, Silchar, Diphu aser Darrang-Udalguri densem lir.

Assam nung Lok Sabha election tanabuba shilem nung constituency pongu nung candidate 61 tokteptsü.

Karimganj Lok Sabha constituency nungi candidate (24) timba lir aser Diphu nungi candidate (24) ishiba lir

Lok Sabha elections

tanabuba shilem atema vote ya anepdang 7 ako nungi agütsü tenzüchtsü aser nikongtsütsü 5 ako nung tembangtsü.

Assam nung constituency pongu nungi asem nung muslim nunger voter temi tongtibang shilem agitsü imlar.

Diphu constituency koba Scheduled Tribes atema mekazüka tokja lir iba dak alaka tanungba constituency tem nung Bengali oshi jembiba Muslim nunger aika lir.

Iba den bendenloksema Silchar aser Karimganj constituency nung Bengali Hindu nunger voter aika lir.

Karimganj nung electorate shilem 55.7 bo Muslim nunger lir aser Silchar nungbo Muslim

nunger voter shilem 40 dang lir. Nagaon nung Muslim nunger voter shilem 58 shi lir aser Darrang-Udalguri nung parnok shilem 40 lir.

Taoba küm delimitation sülen Kaliabor (tang Kaziranga) parliamentary constituency nung Muslim nunger aika aliba tesem kar Nagaon menden nung bendenloktsüogo.

Iba temelenshi ajanga Nagaon constituency nung Muslim nunger voter tem aika kümogo.

Kasa mapang nung Lok Sabha election tanabuba shilem nung state 13 nung parliamentary constituency 88 nungi candidate 1210 tokteptsü.

AR convoy amakba atema ULFA-I den sendaka alir nisung 3 apu

Guwahati, Rongchii/April 25 (Agencies): Tenokdangba agütsür aliba ULFA-I den sendaka aliba "over-ground workers" asem puogo.

Parnok asem ya Assam kübok Tinsukia district nung tawa Assam Rifles convoy ka mendanga atar amakba dak sendakba nung puogo.

Iba den bendenloksema Assam nung ketdangsürtemi ULFA-I züngsem ka tasü mang bushitetsü atema meita aoba sentong ka ayongzüko. Iba nisungba ya tawa mendanga atar khatapba mapang tepset asütsü aser pa tasü mang ya iba tesem temeket nung rema alitsü ta bilemer.

April 16 nü 31 Assam Rifles personnel tem Arunachal Pradesh kübok Changlang nungi Assam kübok Tinsukia district

nung Margherita tesemi oya aliba mapang Makumpani arem temeket nung telungpurtem asütsü ta temulung melemi bilemba telok kati mendanga atar maka liasü.

Convoy amakba mapang Assam Rifles sepia ka yiru aser sepaitemi meyiper akhaba mapang telungpurtem yirutsür alitsü ta bilemer.

Iba sülen convoy amakba ya ULFA-I puri nangzüko aser ashiba agi, parnok züngsem ana tepsetba mang ayangtsü atema parnoki iba jenjang agia liasü.

Assam police-i ashiba agi, pua aliba nisung asemprongla ya Arunachal Pradesh kübok Changlang district nungi lir, aser parnok ya Tinsukia district local police aser Assam Rifles sentepa pua liasü.

Parnok rongnung kati ULFA

züngsemtem dang len sayuba den logistical teyari aser osettsü balala teyari agüja liasü. Maneni tanungba ana yagi telungpurtem jena aotsü atema teyari agüja liasü.

Kasa mapang nung sür alitsü ta bilemba ULFA züngsem ka tasü mang bushiteta kinungertem nem agütsütsü atema inyaksangshidar.

Maneni khatapba mapang ULFA züngsem asem yiru aser parnok ya Myanmar nung parnok camp-i anirogo, ta osang ajanga metetdaksü.

Pua alirtem yagi convoy amakba nung densema aliba ULFA züngsemtem maitsü jangjatsüogo aser iba sülen item nisungtem aputsü atema Assam Rifles, Army, aser Arunachal Pradesh police longjemer meita ao tenzüko.

Manipur: Security forces-i mapunung brown sugar meima bener lia apu



Imphal, Rongchii/April 25 (Agencies): Assam Rifles (AR) personnel tem densema security force temi Pherzawl District nung mapu telung nung brown sugar meima bener lia pickup truck ka pua liasü.

Iba gari ya Assam kübok Silchar jila nungi Tipaimukh-i oya aliba mapang pua liasü.

Security forces tem yagi

soap caps 30 nung brown sugar inoker aliba nguteta liasü.

Iba dak sendakba nung Manipur Chief Minister N. Biren Singh-i X sabang ajanga, brown sugar bena aliba pickup truck ka Tipaimukh, Pherzawl District nungi Cachar-i oya aliba mapang apuba atema 39th AR team aser Jiribam PS nem tenüngsang agütsüogo.

Singh-isa, "gari sotba sülen iba team yagi soap cap 30 nung temesepba mozü gram 363.45 bener lia ngutetogo. Ken o dak sendakba nung sepaitemi Abdul Mannan Mazumder aser Khalil Ulla Barbhuiya na puogo aser ken o maneni bushisüngdangtsü atema Jiribam Police Station nem bendanga agütsüogo," ta ashi.

Burkina Faso army-i civilian 200 dak tema tepset: Rights group

Ouagadougou, Rongchii/ April 25 (Agencies): Burkina Faso inadang military forces temi February ita yimtsüng ana nung tila-tanur 56 densema civilian 223 tepset, ta Human Rights Watch (HRW) report tasen ka nung ashi.

Iba nisung lokti tulu tepsetba mapa ya February 25 nü linük north tsütsü Nondin aser Soro yimtsüng nung inyak, ta Brehostibarnü adoktsüba report nung ashir.

Iba mapa ya telungpur telok balala den tesendaktep lir ta tai tonglokja tesem ajaklen military campaign agiba nung shilem ka amai ajiteteter, ta international rights group yagi ashi.

Sepaitemi Nondin nung tanur 20 densema nisung 44 tepset aser anasa Soro nung tanur 36 densema nisung 179 tepset.

HRW ajanga February aser March tsüngta tenük kuli alir aika den asüngdangya süogo aser takum jenbua alirtemi lemsaba video aser noksa tem

kanga junga asadangogo ta ashir. Takum alirtemi bendenba asür tenüngtem parnok angu aser March 15 nü satellite ajanga tangokba noksa nung ajemdaker leper tulu ti jangjatet.

February 24 aser 25 nü telungpur telok balalai linük tesem balala nung barracks aser bases densema mitkar aliba tesem aser tekülem ki ama civilian meyong ki o jen amakdang civilian, sepai aser militia züngsem aika asü.

Defence Minister Mahamoudou Sana-i item azüdokshi ya aitsü saka Nondin aser Soro nung civilian aika tepsetba indangbo mashi.

Al-Qaeda aser ISIL (ISIS) den sendaktepa aliba armed groups aser security forces tsüngta raraba mapang civilian tem tali tim atem aser tesem balala nung prokshi.

Burkina Faso linük tesadang ka shi sorkar kübok masü. Azüdokshi ajanga iba linük nung nisung 20,000

jungnüa tepsetogo aser million ana dak tema pei ki yutsür tesem balala nung jenoka lir.

West Africa nung iba linük ya captain Ibrahim Traore-i aniba mitkar sorkar kübok lir. Democracy yimya nung shimba Tir Roch Marc Kabore-i aniba sorkar mitkar temi tashiyim amshia atsüngdoker ita ti lir 2022 küm September ita Ibrahim Traore-i yimten tashi rakzüka liasü.

Al-Qaeda den sendaktepa aliba Jama'at Nusrat al-Islam wal-Muslimin (JNIM) teloki Burkina Faso indang Thiou district kübok yimtsüng aika amakba rongnung Nondin aser Soro ya dena alitsü südi ta amanger.

Anüolen linüktem nungi mitkar tsütsü teyari agütsüba nung terenlok maliba yong tejashi nung mitkar yimsüsür temi taoba mapang yimsü süa aliba France den tesendaktep rakdang aser security teyari meshia Russia dangi tejak meyip.

Gaza nung nisung tasü mang 400 jungnüa ngutet

Gaza City, Rongchii/April 25 (Agencies): Gaza Strip nung aliba mozüki ana nung nisung jenti rema aliba leper ngutet, kong tetsür, tanur aser teintet rogotem tasü mang dena liasü aser parnok reshikangshia amshiba yimyatem lir, ta ketdangsurtemi ashir.

Gaza south tsütsü Nasser aser al-Shifa mozüki müketa anogo troknü buba tanen makai leper atuba mapang ajangshibatem Palestinian Civil Defence ketdangsurtemi Brehostibarnü ashi.

Nisung tasü mang ter teka alener liasü aser kar dak temang nung medical tubes inoker liasü, anungji parnok ya takum dang aremba ama sayur, ta civil defence züngsem Mohammed Mughier-i ashi.

"Nisung 20 shi takum aremba ama bilemer aser parnok asüba jangjatsü atema forensic examination agitsü," ta Mughier-i ashi.

Gaza south tsütsü Khan Younis nung Nasser Hospital ya lir, aser yanghi civil defence department tekolakba Yamen Abu Sulaiman-i ashiba agi, iba mozüki kima mass graves asem ngutet, ka morgue kishilen, ka morgue jakdang aser ka dialysis building anasa liasü.

Nisung tasü mang 392 ngutetba nungi kinunger temi tasü mang 65 dang jangjatetogo aser temang shisa orr aliba ajanga tanüngba tasü mang mejangjateter. Tasü mang ya tesem ka nung nangdena liasü, anungji moabu nung tepsetba amai sayur, ta pai ashi.

Mughier-i tila tanur asüba indang noksa aser video tem kuli ama sayu aser 'kechiba mass graves nung tila tanurtem lir?' ta asüngdang aser iba ya ajanga Israel sepaitemi meimchir anema mapa tamajung inyakba kuli sayur, ta ashi.

UN human rights chief Volker Turk-i item tasü mang kanga junga aser ochishia bushisüngdangtsü akhanger.

Ajisüaka Israel army indang odongtar Major Nadav Shoshani-ibo Nasser Hospital nung aliba leper ya ita ishika tejakdang Gaza nungeri atuba lir ta ashi. Gaza nung Hamas teloki pua aliba Israel nung bushiba mapang leper nungi nisung tasü mang tutetogo, ta Israel mitkari ashi.

Ukraine-i long-range US missiles amshi tenzükogo

Kyiv, Rongchii/April 25 (Agencies): Ukraine-i Russia den raraba nung longer-range ballistic missiles tem amshi tenzükogo, koba US-i miimshia agütsü ta American ketdangsurtemi ashi.

Item hadir ya taoba mapang US ajanga teyari agütsüba nung dena lir aser tan ita tonga aru. Ukraine indang 'operational security' wazüka ayutsü mechi yimjak nung mesangdong, ta ketdangsurtemi ashi.

Parnoki iba hadir ya occupied Crimea nung Russian targets nung amaktsü atema khenbo amshio.

Ano US teyari ya tang Kyiv leni arur.

Ukraine nem sen billion \$61 jenjang rongsenketzüng aser mitkar tsütsü teyari agütsüba atema Tir Joe Biden-i Bodhbarnü meyongnem

agütsüba sülen America nunger indang nok-nü tali yoktsü tejanga lir.

Ola madoki agütsür aliba missiles ya Army Tactical Missile Systems (ATACMS) indang longer-range version lir, ta state department odongtar kati Bodhbarnü ashi.

Taoba mapang US-i Ukraine nem ATACMS mid-range version agüja liasü, saka iba dang tashi tuluba agütsüba memulungi aru, kechiaser parnok US mitkar tashi dangar nem memetdaktünü.

Ukraine-i item nok-nü ya amshia Russian litsü telung nung amaktsü akok aser rara tuluba kumdaktsütsü, ta ketdangsurtemi bilema liasü.

Ukraine-i mapang talangka nungi iba systems ya meshia liasü, koba ajanga missiles tem kilometre 300 (186 miles)

tashinung khaloktsüteter. Biden-i item hadir agütsütsü February ita mela ta ashir.

Bodhbarnü osangbener den jembidang, tir-i totuyuba agütsüba nung ajemdaker longer-range ATACMS ya agütsü, ta state department odongtari ashi.

"Ukraine-i mepishiba ama operational security wazüka ayutsü mechi US-i iba indang mesangdong," ta Vedant Patel-i rateta ashi.

Iba hadir ya kwika yoka aliar mejangja, saka Washington-i ano tali yoksemtsü sentong lir, ta US National Security Advisor Jake Sullivan-i ashi.

"Iba hadir yagi temelenshi bener arutsütsü. Saka ni taoba mapanga iba sapang nungi ashi ama... yangji takokba malitsü," ta pai ashi.

(Maneni tapak 8 nung...)

Mulungnen



TASOBA : 16.11.1945
TASÜBA : 16.04.2024

Onoki teti meima aliba obala S.LIMAMEREN (Wameken) teti tatem maka anisüngzükdaki ogo. Pa mapang tatsüka shirangba aser asüba mapang kinunger-adianutem, yimtsür-yimer, tembar-medemertem, kiyongertem aser temeimertem shirisa ozü dang nübu, rongsen, shisatsü aser sarasadem agi yariogo, nenok ajak dang kinungertemi pelaba lemsateper.

Nenok ajak dangi tsüngdong arua pelaba meshiteter, saka asen teyanglur Tsüngremi nenok mapa tajung moajang ta ozü tamang sarasadem.

~ Temeim Kinungtsü, Jala-jabaso, Semchirtem aser Kinungertem.



Office of the TULI COLLEGE

Borbora Ward Tuli: 798618, P.O: Tuli Mokokchung, Nagaland.

ADMISSION NOTICE

BA 1st Semester Admission will be commenced from 1st week of May 2024.

COURSES OFFERED:

- o Three Years Undergraduate Major Programme:
- o English, Education, Political Science, Sociology, History, Economics.

MINOR PAPER :

- o AECC - I (Communication English),
- o AECC-II (Environmental Studies)
- o MIL/ Alternative English.

ADDITIONAL COURSES:

* Computer Courses in Partnership with NIELIT:

OTHER CO- CURRICULAR ACTIVITIES:

- * NCC, Educational Tour, Eco Club, Red Ribbon Club, Evangelical Union.

MERITORIOUS TRUST AWARD.

- o B.A final exam 1st Division Rs. 5,000/- each
- o Top Ten Position in B.A Final Exam Rs. 10,000/- Cash along with commendation Certificate.
- o Prospectus and Admission Forms will be issued from the office of the Principal Tuli College after the declaration of HSSLC results 2024.

For details contact : 7005541853 / 9612173184

Principal, Tuli College

ANGO CHANU AYOKER

Kolkata nungi ango chanu tapu balala- common carp, grass carp, catla aser merika temeyoktep den magor April 30 nungi Kohima Road anasa Aolijen sector, Ungma nung angutsü; talinertemi tsünglanglen agüja aliba Contact No. nung tongteprateptsü akok.

- K. Lanu Lkr # 8787650064 / 9862747886

SUMMON FOR SETTLEMENT OF ISSUE (ORDER - V, RULU - 1, 5, 20)

In the court of Shri/ Smti Julian Sitlhou Principal District & Sessions Judge / Civil Judge Sr. Division / Civil Judge Jr. Division, Mokokchung: Nagaland.

Suit No. Declaratory Suit 8/2023

Plaintiff Shri. S.T. Yapang Lkr & Ors

Defendants The Executive Secretary ABAM, Impur & Others.

To,

- 1) The Executive Secretary, ABAM, Impur, Mokokchung, Nagaland.
- 2) Executive Committee, ABAM, Impur, District Mokokchung, Nagaland.

Whereas S. T. Yapang Lkr. & Ors has instituted a suit against you for Declaratory Suit.

You are hereby summoned to appear before the Court in person or by pleader duly instructed and able to answer all material questions relating to the suit on 16.5.24, 10:00 a.m. without fail.

Take notice that in default of your appearance on the date mentioned the suit will be heard and determined in your absence.

Give under my hand and the seal of the Court 22 day of April 2024.

Principal District & Sessions Judge/
Civil Judge Sr. / Civil Judge Jr.
Mokokchung : Nagaland

Civil Judge Sr. Division
Mokokchung : Nagaland

SAI NERC Imphal-i ayongzüka Kohima nung KIRTI Assessment Tests agitsü

Kohima, Rongchii/April 25 (TYO): Department of Youth Resources and Sports, Nagaland aser Sports Authority of India, North Eastern Regional Centre, Imphal (SAI NERC Imphal) na longjemer Kohima nung April 26 nü nungi tenzüka Khelo India Rising Talent Identification (KIRTI) assessment tests ka agitsü.

Nagaland atema shimba asayatem rongnung archery, athletics, wrestling, boxing, aser football densema lir, koba state nungi lanur asayar tajungtem jangjatsü atema tongtibang jenjang ka agiba asütsü. Assessment tests ya April 26 nungi May 1 nü tashi IG Stadium, Kohima nung agitsü aser anogoshi anepdang 9 ako nungi tenzütsü.

SAI NERC Imphal sangdong ka ajanga ashiba agi, iba inyakyim ajanga, performance evaluation atema bharat benchmarks ka

amenoktsü SAI nükjidong lir, aser iba yagi India nung saisapong temaba jenjang kati ajungkettsü. Iba inyakyim yagi lanur asayar tajungtem bushitetba dang masü saka takok angutsü atema jenjang tasen ka lateta toktsür aser iba ajanga linük nung saisapong tarutsü tajungba kümdaktsütsü, ta kasa sangdong ajanga metetdaksü.

Kasa mapang nung Khelo India SAI NERC Imphal, Assistant Director Laishram Samritya Singh-i ashiba agi, KIRTI nükjidongji Talent Assessment Centre tem ajanga küm tepeyong linük ajanga nung assessment agia asayar tajungtem bushitettsü atema lir.

Paisa, assessment tests agiba mapang sentong nung shilem agitem SAI coach aser mongintem tawabangba kübok parnok anema ali mali tendangtsü atema physical fitness tests 10 agitsü.

Assesment nung 100-meter sprint, 600-meter run, shot put, high jump, long jump, aser throw ball amala event-specific trials densema lir, ta ashi.

Maneni pai, arishi küm 8 nungi 18 tsüngda alirtem shirnokisa asayatsü asoshi jangrar parnok iba sentong nung shilem agitsü pelashishia jaokogo. Iba trail nung shilem agitsü atema asayartemi parnok indang gear aser equipment tem bener arutsü nungdaker, kong running shoes aser football cleats amala asaya ka asoshi mejeta nungdakba osettem densema lir.

KIRTI assessment test ya Archery (April 26), Athletics (April 27), Wrestling (April 29), Boxing (April 30), aser Football (May 1) atema agitsü. Tejangrartemi osang tejangjaba agitsü atema item number; 9635886548 mesüra 8287651060 nung tongteprateptetsü.

Xavi-i maneni Barcelona coach mapa inyakttsü

Rongchii/April 25, 2024 (Agencies): Xavi-i maneni Barcelona coach mapa inyakttsü ta club sangdong ka ajanga Bodhbarnü AFP nem metetdaksü. January ita pai season tembangba sülen club toktsütsü ta sangdonger liasü.

Spain nung media sangdong balala ajanga ashiba agi, arishi küm 44 tain coach yagi 2025 küm tashi inyakttsü atema tenangzüktepba yangluogo. Club Tir Laporta aser sporting director Deco na den senden ka amenba sülen pa temulung melenshia iba telemtetba agia liasü.

Champions League nung Barcelona pur quarter-finals nung Paris Saint-Germain-i tsükdaktsüba sülen hopta ka lir Xavi-i iba telemtetba agiogo.

Kasa mapang nung Deobarnü Real Madrid goal 3-2 agi makokba sülen Barcelona pur La Liga nung temaba jenjang nung aliba Real pur dang nungi point 11 agi tajemba

kümogo. Taoba Barcelona midfielder Xavi-i, coach mapa toktsütsü atema telemtetba agiba sülen pa kanga anisüngzüka liasü, ta ashi.

Pai iba mapa ya pai kanga inyaknia aliba mapa ka ta aiben shiogo, saka mapa agizüker inyakba mapang iba mapa abentsü atema pressure kanga sashira aküm.

"Anogoshia iba mapa abentsü atema ni medemsü ta bilemdaktsür," ta pai kidang goal 5-3 agi Villarreal makokba sülen ashi.

"Iba ya coach ajak dak ataloker. Pep-i (Guardiola) kü dang Valverde daka iba ya atalokogo ta ashi aser nia Luis Enrique kangshiba nguogo," ta pai ashi.

"Aiben akümtsübu tangutsü tim mangur ama bilemer aser nü mapa asoshi tenüngsang peria magütsür ama bilemer. Iba ajanga shitemang aser tekolok shisatsü, nü mood aser

tebilemdangba ajak ajema kümdaktsür. Ni kanga dang positive nisung ka lir saka tashi kanga meite akümer aser mapang ka nungbo iba ya kecha tagidak mali aser maneni inyakttsü nungdak madoker ta bilemdaktsür," ta Xavi-i ashi.

Barcelona pur tawa rongsenketzüng nung ken o balala adoka kashia arudar. Barca-i 2021 küm Nobember ita Xavi shim aser pa lenisüba nung tia melenshia taoba küm parnoki league title benogo.

Ajisüaka tanga asaya aliba season nung parnok Spanish Super Cup nung Real puri goal 4-1 agi akok aser Copa del Rey nung Athletic Bilbao puri tsükdakja liasü.

Xavi-i coach mapa toktsütsü ta sangdongba sülen Barcelona B team coach Rafael Marquez, taoba Germany coach Hansi Flick aser Brighton coach Roberto De Zerbi nung den coach mapa atema sendaktepa liasü.

Archery World Cup: Recurve tebur team final-i iogo

Rongchii/April 25, 2024 (Agencies): Brehostibarnü Shanghai nung Archery World Cup Stage 1 nung India tebur team recurve final-i aiba sülen India team nung Tarundeep Rai, Dhiraj Bommadevara aser Pravin Jadhav nung Olympic champions Korea team den asayatsü.

Bodhbarnü tetsür aser tebur compound team final-ia medal anabosa angutsü jangjaba sülen tang tebur recurve team-a final-i iogo.

Semifinal asaya nung India recurve team-i Italy team 5-1 (55-54, 55-55, 56-55) agi koka liasü. India team ya Tokyo Olympics nung gold medal anguba team nung Woojin, Lee

Woo Seok aser Kim Je Deok nung den Deobarnü final asayatsü.

Top seed Korea team yagi semifinal asaya nung Chinese Taipei nung asayar Tan Chih-Chun, Lin Zih-Siang aser Tai Yu-Hsuan nung 6-0 (57-50, 58-56, 58-54) agi koka liasü.

Compound asaya nung taoba mapang world youth champion Priyansh aser reigning Asian Games gold-medallist Jyothi Surekha Vennam nata pei tata kija asaya nung semifinal-i iogo aser medal kabosa angutsü meranga asayadar.

Mezüngbuba round bye anguba sülen India tebur recurve team-i Indonesia team

5-3 (55-56, 54-54, 55-51, 55-53) agi koka liasü. Iba sülen quarter final asaya nung parnoki Spain team 5-1 (59-54, 56-55, 55-55) agi akok.

India tetsür team nung Deepika Kumari, Ankita Bhakat aser Bhajan Kaur nungeri junga masayateti mezüngbuba asaya nung Mexico team 3-5 (50-50, 55-49, 51-54, 52-54) agi mekoki liasü.

Iba sülen World Cup gold-medallist Jyothi-i compound semifinal kija asaya nung külem India tsür Avneet Kaur 143-142 agi koka liasü.

Jyothi Honibarnü semifinal asaya nung Estonia tsür Meeri-Martia Paas den asayatsü.

World Chess Championship ayongtsü atema India-i bid asütsü

Rongchii/April 25, 2024 (Agencies): Tawa shimba All India Chess Federation (AICF) secretary Dev Patel-i Brehostibarnü, taküm D Gukesh aser China nung defending champion Ding Liren na World Championship final asaya ayongzüka asayatsü atema India-i bid asütsü, ta shiogo.

Arishi küm 17 tain Gukesh ya Toronto nung Hombarnü Candidates Tournament akokba sülen world title atema challenger rongnung tanobusang kümogo.

World championship koba küm tatemlen asayatsü lir iba atema tesem aser anogo tang tashi melemteti lir.

"Chess asaya achaayangba lokti tentet tongtiba FIDE den sensaksemtsü onok renema lir aser world championship tajungtiba India nung asayatsü ta temulung lema bilemer," ta Patel shiba arishi küm 24 dang aser Gujarat Chess Association tekolakba lir pai PTI dang ashi.

"Kü atema tang nükjidong

tongtibangtibaji World Championship ayongzüka asayatsü atema FIDE dangi bendangtsü asoshi masü saka linük nung chess asaya nungtugu kümdaktsütsü atema lir," ta pai ashi.

Patel-i ashiba agi, AICF-i iba ken o ya Hokolbarnü FIDE dangi abentsü. Iba asayamung ayongzüka asayatsü atema bilemdanga aliba state tem rongnung Gujarat, Tamil Nadu, Telangana aser Andhra Pradesh densema lir.

Iba asaya indang jembiba mapang AICF secretary yagi, pai asayar kati kechi nungdaker iba indang aika meteta lir ta ashi.

"Ni iba asaya koda tebenja aji meteta lir aser Gukesh mesüra tanga asayar mashi ka nungtugu kümdaktsütsü atema tsürapur, coach tem aser iba dak sendaka alirtemi nongita yaritsü koda tongtibang aji ni meteta lir," ta pai ashi.

Patel ya taoba ita AICF secretary mapa abentsü atema shima liasü.

BENDANGLI OSANG : Tapak 7 nungi...

Ukraine-i long-range US missiles amshi...

Longer-range ATACMS ya ajanga Ukraine-i Russia kübok aliba tesem telunglen maktetsü, talisa sepai aliba tesemtem, osettsüset balala ayuba tesem aser logistics hubs amala nung maktetsü.

Longer-range ATACMS ya taoba hopta amshia occupied Crimea nung Russian airfield ka amak aser Mongulbar aonung Berdyansk yimti nung Russian sepai alidak amak.

Nok-nü tasen amshiba ajanga iba rara memelenshitsü, ta Russia-i Bodhbarnü ashi.

Tawa ita ishika Kyiv-i anüolen linüktem dang teyari meshiba tali akum, kechiaser pari rizünga aliba injang aser bomb tagimar aser Russia-i tanem-tanemi tesem aika agiyonga arur.

Congress nung züngsem kari anema nokdakba yong ita aika anendaka arur Bodhbarnü Biden-i aid package tasenba nung meyongnem agütsü.

Sen billion \$61 jenjang teyari agütsütsü aliba nungya nok-nü mezüng alitsü imlar, kong iba sen ajak ya nok-nü nung kisüng meindoktsü.

Russia-i tashi ajak amshia Ukraine amak tenzüker US-i Ukraine nem sen billion \$44 jenjang teyari agüja lir.

"Iba yagi America tali

tajungba akumtsü, iba yagi alima tali tajungba akumtsü," ta US tiri iba teyari tasenba ya ozüng kuma meyongnem agütsüba sülen ashi.

Iba osang angazükba sülen, "Asenok o intepa aser temulung melemteti arudang küm tesadang ka indokba joko asenoki keptoktsü," ta Ukraine Tir Volodymyr Zelensky-i ashi.

"Iba mapang Russian occupier-i kechi inyaktet, Putin-i tang kechi inyakttsü sentong ali, asenoki meyiper pa anema inyakttsü."

Asükwa mapang Avdiivka yimti rakzüka sülen ano hopta ishika tsüngta Russia-i asendenshir raratsü akok, ta Zelensky-i tawa shia liasü.

Ukraine sepaitem ita ishika injang-bomb aser air defence system agi anünga arur aser nisung takum samaba aser litsü-lika rakzükdaktsüba ya US aser danga Western allies temi military aid agütsüba nung menuba ajanga lir ta ketdangsürtemi tenüng asener.

Russia-i February 24, 2022 nü nungi Ukraine maka arudang anatsülen sepaitem timba sür nisung meyirijang aika tepsetogo mesüra yirur lir aser ano nisung million aika pei ki yutsür tesem balala nung jenoka lir.

BILEMDANGANG

Tetsübu dang nungi tashi taitbaji Timla dang.